

## **REGULAMENTO PARA O RECOÑECIMENTO DE GRUPOS DE INVESTIGACIÓN DA UDC**

(Aprobado en Consello de Goberno de data 10-02-2005, modificado en Consello de Goberno de data 25-02-2010)

### **INTRODUCCIÓN**

A LOU menciona os grupos de investigación como un dos niveis en que se organiza a investigación nas universidades. De conformidade co previsto no art. 56.1 dos Estatutos da UDC, resulta conveniente definir que é un grupo de investigación recoñecido pola UDC e elaborar a normativa que estableza a súa creación e composición.

A constitución de grupos de investigación debe acompañarse da elaboración dun censo destes, para coñecer de forma precisa a situación da investigación na UDC e poder establecer unha política científica adecuada, así como para facilitar a difusión da investigación no contorno empresarial e socio-cultural. Os grupos de investigación serán a base sobre a que se elaborará a produción científica da UDC, identificando dentro deles os que teñan a consideración de grupos de excelencia.

### **Definición de grupo de investigación**

Os grupos de investigación constitúen a estrutura básica para o desenvolvemento da investigación na universidade. Son estruturas estables de organización e xestión da actividade investigadora con recursos suficientes que permiten unha actividade investigadora competitiva e continuada, apoiada nunha capacidade de financiamento sostible.

Os grupos de investigación son o resultado da libre e voluntaria agrupación de investigadores doutores con capacidade plena para o desenvolvemento da actividade investigadora e outro persoal da UDC, por razóns de coincidencia estable nos seus obxectivos, infraestruturas e recursos compartidos, en torno a unhas determinadas liñas de investigación, desenvolvemento e innovación.

Poderanse constituír como grupo de investigación os grupos de profesorado e investigadores que, cumprindo os requisitos do presente regulamento, solicitasen o seu recoñecemento como tal grupo á Vicerreitoría de Investigación e fosen aprobados pola mesma, logo do informe favorable da Comisión de Investigación.

### **CRITERIOS PARA A CONSTITUCIÓN DUN GRUPO**

Un grupo de investigación recoñecido pola UDC estará integrado como mínimo por 3 investigadores doutores vinculados á UDC, un dos cales debe ter unha antigüidade mínima de seis anos de doutor. Como índice de estabilidade, sostibilidade e competitividade, un grupo debe acreditar, conxuntamente, dúas das condicións seguintes:

- Financiamento continuado como IP durante os últimos catro anos con, ao menos, unha participación en proxectos financiados en convocatorias públicas externas á Universidade ou dous contratos de I+D por importe superior a 12.000 euros durante o mesmo período
- 2 sexenios de investigación activos nos membros do grupo (é dicir, obtidos nos últimos sete anos). En caso de non reunir os requisitos para solicitar sexenios, débense acreditar polo menos 5 publicacións de calidade no seu ámbito nos catro últimos anos.
- Dúas teses de doutoramento dirixidas nos seis anos anteriores e, polo menos, outra acreditable en fase de realización.

O grupo non poderá ser un simple agregado de investigadores senón que debe colaborar cun obxectivo científico común. Neste sentido terase en conta: a existencia dunha temática común, de obxectivos específicos similares e/ou complementarios, a utilización de técnicas similares, o aproveitamento dunha infraestrutura común, a coparticipación en proxectos de investigación, a existencia de publicacións mixtas, etc.

Cada grupo deberá ter unha persoa coordinadora, que debe ser PDI doutor do cadro de persoal da UDC, con antigüidade mínima de seis anos de doutor e que acredite actividade investigadora. Ademais da coordinación, exercerá como responsable e representante do equipo investigador.

O grupo é unha estrutura con vocación duradeira. Non é o equipo de investigadores dun proxecto nin obriga a todos os seus membros a participar en todos os proxectos do grupo. Os membros do grupo comprométese a formar parte del por un período de, polo menos, 3 anos desde a data da súa incorporación a este.

Non se pode pertencer a máis dun grupo. Porén, iso non é ningún obstáculo para que un investigador colabore en proxectos con outros grupos, senón máis ben ao contrario: as colaboracións son desexables e signo de interdisciplinabilidade.

### **Membros do grupo**

Poderán formar parte do grupo de investigación:

1. Todas as figuras de profesorado e investigadores da UDC recollidas na legislación vixente.
2. Os Investigadores da DC dos programas Ramón y Cajal, Parga Pondal, Juan de la Cierva, Ángeles Alvari-o e similares, sempre que lles reste unha vinculación coa UDC superior a 1 ano no momento de solicitar o alta
3. Os/as alumnos/as de terceiro ciclo que estean oficialmente matriculados na UDC no periodo de elaboración da tese de doutoramento.
4. Os bolseiros e contratados de investigación pola UDC de calquera entidade pública ou privada sempre que exista unha convocatoria pública, que a duración mínima da bolsa ou contrato sexa dun ano e que estean oficialmente matriculados no Terceiro Ciclo na UDC no periodo de elaboración da tese de doutoramento.

5. As persoas contratadas con cargo a proxectos, convenios ou contratos de investigación sempre que a duración do contrato sexa como mínimo dun ano ininterrompido. No caso de non seren doutores teñen que estar oficialmente matriculados no Terceiro Ciclo na UDC no periodo de elaboración da tese de doutoramento agás que se trate de persoal técnico ou administrativo.

- Así mesmo, poderán formar parte do grupo de investigación, como **colaboradores externos**, docentes e investigadores doctores doutras institucións. Para elo deben contar coa autorización da institución a que pertencen. Esta colaboración non supón vinculación coa UDC a ningún efecto.

A incorporación aos grupos de investigación faraa:

- a. O profesorado e os investigadores incluídos nos puntos 1 e 2 do apartado anterior por petición propia, co visto e prace do investigador responsable do grupo.
- b. Os doutorandos no grupo que se integre o seu director de tese
- c. As persoas bolseiras e contratadas con cargo a proxectos, contratos ou convenios, no grupo en que se integre o director ou investigador responsable do proxecto ou convenio, por petición deste.
- d. O persoal de apoio técnico ou de xestión contratado con cargo a proxectos ou convenios, no grupo en que se integre o director ou investigador responsable do proxecto ou convenio, por petición deste.

*Causas de baixa de membros de Grupos*

- Que finalice a vinculación da persoa coa UDC
- Que se produza unha fusión de varios grupos para constituíren un de tamaño superior.
- Que un doutorando membro dun grupo cambiase de director de tese e este pertenza a outro grupo.
- Que se demostre a inexistencia de actividades realizadas dentro do grupo.
- Por petición propia

Aínda que o coordinador do grupo é o encargado do seu mantemento, se se detectar que unha persoa xa non pertence á UDC darase de baixa automaticamente.

Se por algunha causa, un grupo deixa de cumprir as condicións requiridas daráselle un periodo de 6 meses, tras os cales, de persistir a situación, se disolverá. Recoñecemento de grupo de investigación

O recoñecemento como grupo de investigación, así como a incorporación ou baixa dos seus membros, débese solicitar á Vicerreitoría de Investigación no primeiro trimestre de cada ano, facendo constar a seguinte información:

- Nome do grupo. Debe ser un nome non excesivamente longo e autoexplicativo do campo temático en que traballa o grupo. O nome do grupo non debe entrar en conflito co nome doutro grupo xa existente.
- Membros que o compoñen. Xunto coa sinatura de conformidade de cada un deles
- Ámbito de investigación concreto: ámbito estratéxico da actividade investigadora do grupo, área/s de coñecemento ANEP e área de proxección/interese socioeconómico
- Liñas de investigación en que traballa. Un grupo pode ter unha ou máis liñas de investigación e cada liña debe ter unha persoa responsable, con título de doutor, e non necesariamente coincidente coa persoa coordinadora do grupo. Pódese ser responsable, como máximo, de dúas liñas de investigación. Os bolseiros quedan excluídos de poderen ser responsables de liñas.
- Recursos de equipamento significativo (se se dispón del), capacidades e resultados. Unha capacidade quere dicir un conxunto de coñecementos ou de técnicas que poden ser empregados para levar a cabo un determinado traballo ou prestar un servizo (as capacidades transfírense normalmente a través de traballos de I+D, de apoio técnico, consultoría ou servizos técnicos). Os resultados refírense a desenvolvementos xa realizados e que poden ter interese para as empresas e normalmente veñen materializados nunha patente, un software, etc.

## **Disolución**

Os grupos de investigación disolveranse:

- a. De se dar de baixa a persoa coordinadora dun grupo e non se propor unha nova, o grupo darase de baixa de forma automática.
- b. Se deixan de cumprir os requisitos durante un período superior a seis meses.
- c. Por petición da maioría do profesorado e investigadores funcionarios e contratados.
- d. Se quedan cun só membro, o grupo será dado de baixa de forma automática
- e. Por non desenvolveren tarefas de investigación, por proposta da Vicerreitoría de Investigación e coa aprobación da Comisión de Investigación.

A disolución deberase realizar en todo caso atendendo ao cumprimento dos proxectos e contratos vixentes nese momento.

## **Organización e xestión**

- O grupo deberá establecer a súa adscrición formal a un departamento, a un instituto ou a un centro tecnolóxico en que desenvolvan a súa actividade a persoa coordinadora ou a maior parte dos integrantes do grupo, logo do informe favorable de aceptación da adscrición
- A persoa coordinadora do grupo actuará de interlocutora para os efectos de xestión coa Vicerreitoría de Investigación e será a encargada de comunicar a información correspondente ao resto de membros.
- A xestión económica da produción científica e dos proxectos e/ou convenios poderá ser levada a cabo de forma autónoma polos propios grupos de

investigación, no marco da normativa reguladora das fontes de financiamento e dos contratos de investigación.

- O control dos grupos de investigación corresponderá á Vicerreitoría de Investigación e á Comisión de Investigación.

#### *Implicacións dos cambios de grupo*

Os investigadores son libres de asignarse ao grupo que soliciten, sempre que respecten os compromisos asinados e o grupo receptor os acepte. Ninguén pode ser obrigado a pertencer a un grupo de investigación. Unicamente os investigadores deberán facer fronte aos compromisos adquiridos. Ninguén pode pertencer simultaneamente a dous

grupos de investigación distintos.

Liñas de Investigación: se unha persoa responsable de liña se dá de baixa do grupo e de non se presentar un responsable de liña alternativo darase de baixa a liña de forma automática.

### **CATÁLOGO DE INVESTIGACIÓN DA UDC**

A Universidade debe difundir a investigación no contorno empresarial e socio-cultural e de aí xorde a necesidade de recoller e sistematizar toda a información no "Catálogo de investigación da UDC".

Para os efectos de asegurar unha completa promoción e catalogación das actividades desenvolvidas na UDC, o Catálogo de Investigación consta, ademáis do rexistro de Grupos, os de Unidades de investigación e de investigadores individuais, co fin de incorporar a todos aqueles profesores con actividade investigadora que por diversas razóns non constitúan un grupo de investigación de conformidade cos criterios definidos nesta normativa.

Unidade de investigación: Agrupación de investigadores, con actividade investigadora constatable nos últimos cinco anos, con certa estabilidade e que conste con un coordinador que deberá ser doutor funcionario ou contratado doutor.

Investigadores individuais: Poderán darse de alta como investigadores individuais todos aqueles membros do PDI doutores que desenvolvan unha actividade investigadora constatable nos últimos cinco anos.

#### *Depuración da oferta tecnolóxica*

Cada ano, a Vicerreitoría fará unha análise do CI, proponendo, se for o caso, medidas correctoras.

### **DISPOSICIÓN ADICIONAL**

A participación no Catálogo de Investigación da UDC representa unha autorización previa de cada unha das persoas incluídas neles para difundir os grupos, unidades e investigadores, a súa oferta tecnolóxica e a súa experiencia rexistrada a través de proxectos en que participan, publicacións e teses

#### **DISPOSICIÓN ADICIONAL**

A Comisión de Investigación delegada do Consello de Goberno resolverá todas as consultas, dúbidas ou incidencias que xurdiren no desenvolvemento do presente regulamento.

#### **DISPOSICIÓN FINAL**

Este regulamento modificado entrará en vigor ao día seguinte en que o aprobe o Consello de Goberno.